

Na caminda pa “Hey... ta Pasco!” den Ser’i Noka...

Nos artistanan local ta invita bo pa un anochi magico

ORANJESTAD - Dia-huebs 19 di december proximo, e teatro monumental y historico di Ser’i Noka lo bisti di gala pa ta e anfitrión di e regreso di e gran concierto “Hey... ta Pasco!” di Edjean Semleer.

Esaki lo no ta solamente e celebracion di Edjean su 25 aña den farandula, pero tambe e lo ta un esfuerso pa yega na mas fondo pa sigui cu e trabao di restauracion y renobacion di nos teatro den aire liber.

Varios artista, entre nan cantante y musiconan local, a

uni nan mes na e proyecto aki, considerando su importancia y balor cultural.

Algun cu nos ta menciona awe ta Rocco Franken, Maryann Rodriguez, Buddy Vesprey y Jeanedy Semeleer cu ta cantantenan hoben excelente y exitoso cu uni pa brinda nan apoyo y sosten completo na e proyecto aki.

E cantantenan aki a expresa nan admiracion y respet pa e trabao impactante cu Edjean ta haciendo pa 25 aña caba y nan ta sinti nan mes honra di por bay comparti escenario cune durante un concierto asina spera, stima y gusta.

Nan ta manda nan invitacion



cordial na pueblo di Aruba pa asisti e anochi aki di 19 di december pa disfruta di un recital navideño magico y aporta na e hazaña di restaura, renoba y crea un era nobo pa nos anfiteatro di Ser’i Noka. E lo ta un anochi espectacular den cual e herencia y rikesa musical di nos Tata di Cultura tambe lo resalta. Nos artistanan ta comprometi pa sigui e ehempel y deseo di nos Padu Lampe, un gran propagador di nos cultura musical, pa sigui cu e esfuerso di mantene nos identidad bibo y sigui promove nos herencia cultural y rikesa musical.

Companionan local manera

New India Assurance, Setar, Super Food Plaza, Aruba Tourism Authority, Aruba Bank, Fantastic Gardens, Chocoglam, Subway, High Performance y Printshop a mira hopi importancia y balor agrega di e proyecto “Hey... ta Pasco!” y p’esey a dicidi di brinda nan maximo sosten pa e por ta un realidad. Incluyendo nos sister city cu ta Doral na Florida, via e organisacion OASCA (Oranjestad-Aruba Sister Cities Association).

Esaki ta sirbi como ehempel cu nos artistanan local tin un rol sumamente importante den uni y inspira henter un comunidad.

